



Rabu, 10 April 2024

**Ogen: Habakuk 1:12-17**



**"Penungkunen Habakuk"**



// *Tuhan, bena-benana nari pe Kam kap Dibata. Kam kap Dibatangku si Badia si tetap rasa lalap. O Tuhan Dibatangku ras sekawalku, enggo ipilihNdu bangsa Babilon janah ibahanNdu ia jadi megegeh gelah banci iukumna kami." Tapi uga maka tahan Kam ngidah kalak penipu dengen jahat enda?*

Penungkunen si isehken Habakuk man Tuhan. Habakuk nehken penungkunen si turah i bas pusuhna man Tuhan erkiteken Habakuk lanai nari tahan ngidah penderitan bangsa Dibata. Penungkunen e rehna arah kinigetemen pusuh erkiteken perbahanen bangsa Babilon si kejam nandangi bangsa Dibata. Turahna penungkunen Habakuk man Tuhan "*Kuga maka bagi nurung tempa perbanNdu manusia e tah pe bagi perkis si la erpengulu?"* Habakuk ngidah dengen nggejapken maka Tuhan tempa-tempa mpeturut bangsaNa i kuasai bangsa Babilon. Habakuk erpengakap maka Tuhan lanai mperdiateken bangsaNa, lanai erkeleng ate dengen enggo nundalken bangsaNa. Erkieken si e me maka turah penungkunen Habakuk man Tuhan.

Kita pe selaku Moria melala turah penungkunen-penungkunen bas kegeluhenta; janah penungkunen si sehken kita e megati la lit jababna. Penungkunenta turah erkiteken ngidah buena perbahanen-perbahanen si la mehuli, kinilaadilen, kinilabujuren dengen nggeluh erbana-bana tapi si akap maka Tuhan lanai mperdiateken kita anak-anakNa, kita erpengakap maka Tuhan lanai erkeleng ate kempak dirinta.

Penungkunen si sehken man Tuhan megati la si dat jababna, penungkunen si sehken man Tuhan megati la si dat tampukna; tapi si e kerina labo erkiteken Tuhan lanai erkeleng ate nandangi kegeluhenta entah pe Tuhan mpeturut kita lit i bas kebimbangan; lit sura-sura entah pe rencana-rencana Dibata si ateNa icidahkenNa gelah kita tetap nggeluh setia i bas kiniteken dengen nggejapken KuasaNa. Sura-sura Tuhan kin pe gelah kita rembak ras Ia. Ngarapken kuasaNa nampati kita ndalani kegeluhen enda. E maka si timai Tuhan mereken jababen penungkunenta.

☞ *Sehkenlah penungkunen man Tuhan*